



Број/Број: 04/1,03/11-05-1-317/12

Сарајево/Сарајево, 11.2.20013.

**Izveštaj o zvaničnoj posjeti predsjedavajućeg
Predstavničkog doma PSBiH Bože Ljubića, zamjenika predsjedavajućeg
Predstavničkog doma PSBiH Denisa Bećirovića i poslanice u Predstavničkom domu
PSBiH Milice Marković Republici Azerbejdžan, od 4. do 7. februara 2013.**

Na poziv predsjednika Narodne skupštine Republike Azerbejdžan Ogtaja Asadova, predsjedavajući Predstavničkog doma Parlamentarne skupštine BiH Božo Ljubić, zamjenik predsjedavajućeg Predstavničkog doma Denis Bećirović i poslanica u Predstavničkom domu Milica Marković boravili su u zvaničnoj posjeti Republici Azerbejdžan od 4. do 7. februara 2013.

U pratnji delegacije, u posjeti Azerbejdžanu bili su: Jelena Rajaković, šefica Odjela za bilateralne odnose, Veso Vegar, šef Kabineta Bože Ljubića, i Amila Žujo, prevodilac.

Članovi delegacije su tokom prvog radnog dana bilateralne posjete Republici Azerbejdžan u odvojenim susretima razgovarali s predsjednikom Republike Ilhamom Alijevim i predsjednikom Parlamenta Azerbejdžana Ogtajem Asadovim.

Tokom ovih susreta Božo Ljubić skrenuo je pažnju na mogućnosti saradnje dvije zemlje, prezentirajući ekonomske potencijale BiH, s posebnim akcentom na oblasti hidroenergetike, metalne industrije, poljoprivrede, namjenske industrije i rudarstva. On je istakao značaj Biznis foruma koji će se uskoro održati u Banjoj Luci i na kojem će delegacija Azerbejdžana imati najaktivnije učešće, kao i značaj rute azerbejdžanskog gasovoda za BiH.

Denis Bećirović osvrnuo se na činjenicu da su odnosi između dvije zemlje dobri i bez otvorenih pitanja što, kako je rekao, treba biti iskorišteno za konkretne poteze. Istakao je kako su poželjni češći susreti predstavnika BiH i Azerbejdžana i jačanje saradnje u oblasti medicine, kulture kao i saradnje na akademskom nivou, a kao posebno bitnu oblast za moguće povezivanje izdvojio je prezentiranje turističkih potencijala naših zemalja. Milica Marković pohvalila je dobre odnose BiH i Azerbejdžana, napomenuvši da Rezolucija o Azerbejdžanu, koja je usvojena na sjednici Predstavničkog doma PSBiH, predstavlja prijateljsku poruku Bosne i Hercegovine građanima Azerbejdžana.

Predsjednik Republike Azerbejdžan Ilham Alijev podsjetio je da dobri odnosi naše dvije zemlje koje, prema njegovim riječima, imaju mnogo sličnosti i dugu tradiciju. Naglasio je kako Azerbejdžan ostvaruje aktivan dijalog sa zemljama bivše SFRJ i iskazao veliki interes Azerbejdžana za zapadni Balkan koja se, kako je rekao, ogleda i u intenzivnim posjetama delegacija iz Azerbejdžana zemljama regiona. Alijev je istakao da, nakon intenziviranja diplomatskih kontakata s našom zemljom, Azerbejdžan ima velike planove za investiranja u Bosnu i Hercegovinu.

Predsjednik Parlamenta Ogtaj Asadov ukazao je na izuzetan značaj posjete delegacije PSBiH Azerbejdžanu, rekavši kako ona predstavlja važan korak za intenziviranje bilateralnih odnosa između zemalja.

Delegacija je posjetila Aleju slavnih i u ime PSBiH položila vijenac na grob Hajdara Alijeva, bivšeg predsjednika i narodnog vođe Republike Azerbejdžan.

Tokom drugog dana zvanične radne posjete Azerbejdžanu, delegacija Predstavničkog doma Parlamentarne skupštine BiH imala je tri odvojena sastanka s visokim zvaničnicima ove prijateljske zemlje.

Ministar zdravlja Azerbejdžana Ogtaj Shiralijev upoznao je članove naše delegacije s unapređenjem nivoa medicinske zaštite u njegovoj zemlji i izrazio zainteresiranost za saradnju, naročito u oblasti farmaceutske industrije s obzirom da je iskustvo BiH u toj oblasti odlična bazu za povezivanje. On je također rekao da je u pripremi Memorandum o razumijevanju između naše dvije zemlje u oblasti zdravstva.

Božo Ljubić upoznao je domaćine s načinom na koji je u Bosni i Hercegovini organiziran sistem zdravstvene zaštite koji predstavlja nastavak vrlo razvijenog sistema kakav je postojao prije rata. Kao modalitete razmjene iskustava on je potencirao intenzivnije povezivanje medicinskih stručnjaka i studenata čime bi se doprinijelo daljnjem razvoju medicinske edukacije. Pri tome je istakao kvalitet kliničkih univerzitetskih centara u Sarajevu, Mostaru, Banjoj Luci i Tuzli a ministar Shiralijev pokazao je zainteresiranost za potpisivanje memoranduma o saradnji ovih centara s klinikama u Azerbejdžanu.

Tokom susreta s ministrom za ekonomski razvoj Azerbejdžana Šahinom Mustafajevim razgovarano je o potrebi intenzivnije privredne saradnje dvije prijateljske zemlje. Kao preduslov napretka istaknuta je nužnost usaglašavanja i potpisivanja međudržavnih sporazuma o zaštiti investicija kao i o trgovačkim ekonomskim odnosima. Božo Ljubić iskoristio je priliku da domaćine upozna s prirodnim resursima BiH za koje bi ulagači iz Azerbejdžana mogli biti zainteresirani i izrazio nadu da ćemo vrlo brzo biti u prilici govoriti i o konkretnim projektima.

Zamjenik predsjedavajućeg Denis Bećirović rekao je da Bosna i Hercegovina ima odličan geografski položaj te da je na pragu realizacije velikih infrastrukturnih projekata kao što je Koridor 5c. On je dodao da su nedovoljno iskorišteni i za ulaganja otvoreni poljoprivredni i hidropotencijali kao i mogućnosti investiranja u metalnoj industriji Bosne i Hercegovine. Također, naglasio je i mogućnosti saradnje u oblasti zimskog i vjerskog turizma.

Dobru geografsku poziciju Bosne i Hercegovine potencirao je tokom razgovora i azerbejdžanski ministar za industriju i energetiku Natig Alijev koji je rekao da Azerbejdžan već ima velike investicije u zemljama našeg regiona. Ovom prilikom istakao je da je Azerbejdžan zainteresiran za ulaganja u rafinerije i naftne terminale jer oni njegovoj zemlji mogu poslužiti i kao dobra osnova za nastup na tržištima regiona zapadnog Balkana i EU. Milica Marković istakla je da bi za konkretnije razgovore i povezivanja mogao poslužiti i predstojeći Biznis forum koji će se od 18. do 20. februara 2013. održati u Banjoj Luci od kojeg Bosna i Hercegovina ima velika očekivanja s obzirom na zaista posebne prirodne resurse koji na obostranu korist mogu biti primamljivi za investitore iz inozemstva.

šefica

Odjela za bilateralne odnose

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol

Kopija: Ministarstvo vanjskih poslova BiH